

# 青乌经

—— 樗里子(著)

## 上篇

盘古浑沦，气萌太朴，分阴分阳，为清为浊，  
生老病死，谁实主之。无其始也，无有议焉。  
不能无也，吉凶形焉。曷如其无，何恶于有。  
藏于杳冥，实关休咎。以言谕之，似若非是。  
其于末也，一无外此。其若可忽，何假于予。  
辞之庞矣，理无越斯。山川融结，峙流不绝，  
双眸若无，乌乎其别。福厚之地，雍容不迫。  
四合周顾，辨其主客。山欲其凝，水欲其澄，  
山来水回，富贵丰财，山止水流，虜王囚侯。  
山顿水曲，子孙千亿。山走水直，从人寄食。  
水过东西，财宝无穷。三横四直，官职弥崇，  
九曲委蛇，准拟沙堤，重重交锁，极品官资。  
气乘风散，脉遇水止，藏隐蜿蜒，富贵之地。  
不畜之穴，是谓腐骨。不及之穴，主人绝灭。  
腾漏之穴，翻棺败椁。背囚之穴，寒泉滴沥。  
其为可畏，可不慎乎。百年幻化，离形归真。  
精神入门，骨骸反根。吉气感应，鬼神及人。  
东山吐焰，西山起云，穴吉而温，富贵绵延，  
其或反是，子孙孤贫。童断与石，过独逼侧，  
能生新凶，能消已福。贵气相资，本源不脱，  
前后区卫，有主有客。水流不行，外狭内阔。  
大地平洋，杳茫莫测。沼沚池湖，真龙憩息。  
情当内求，慎勿外觅。形势弯趋，生享用福。  
势止形昂，前涧后冈，位至侯王。  
形止势缩，前案回曲，金谷碧玉。  
山随水著，迢迢来路，挹而注之，穴须回顾。  
天光下临，百川同归。真龙所泊，孰辨元微。  
虾蟆老蚌，市井人烟，隐隐隆隆，孰探其源。

## 下篇

若乃断而复续，去而复留。奇形异相，千金难求。  
折藕贯丝，真机落莫。临穴坦然，形难扞度。

障空补缺，天造地设，留与至人，前贤难说。  
草木郁茂，吉气相随，内外表里，或然或为。  
三冈全气，八方会势，前遮后拥，诸祥毕至。  
地贵平夷，土贵有支。穴取安止，水取迢递。  
向定阴阳，切莫乖戾，差之毫厘，谬以千里。  
择术之善，建都立县。一或非宜，立主贫贱。  
公侯之地，龙马腾起。面对玉圭，小而首锐。  
更遇本方，不学而至。宰相之地，绣墩伊迓，  
大水洋朝，无极之贵。空阔平夷，生气秀丽。  
外台之地，捍门高峙，屯军排迎，周回数里，  
笔大横椽，足判生死。此低彼昂，诚难摹拟。  
官贵之地，文笔插耳，鱼袋双连，庚金之位，  
南火东木，北水鄙技。地有佳气，随土而起，  
山有吉气，因方所止。文士之地，笔尖而细，  
诸水不随，虚驰名誉。大富之地，圆峰金柜。  
贝宝沓来，如川之至。小秀清贵，圆重富厚。  
贫贱之地，乱如散钱，达人大观，如示诸指。  
幽阴之宫，神灵所主。葬不斩草，名曰盗墓。  
葬近祖坟，殃及子孙。一坟荣盛，十坟孤贫。  
穴吉葬凶，与弃尸同。阴阳合符，天地交通。  
内气萌生，外气成形。内外相乘，风水自成。  
察以眼界，会以情性。若能悟此，天下横行。